



داتوق منtri بس سلاڠور

DATO' MENTERI BESAR SELANGOR

Tarikh : 10 Ramadan 1435H
6hb. Ogos 2014

YB. Dato' Dr Tan Kee Kwong

Pengerusi Lembaga Disiplin
Parti Keadilan Rakyat
A-1-09 Merchant Square
No. 1 Jalan Tropicana Selatan 1
47410 Petaling Jaya

DENGAN TANGAN

YB. Dato'

NOTIS TUNJUK SEBAB

Saya merujuk perkara di atas dan menjawab surat bertarikh 5 Ogos 2014 seperti berikut:

1. Apabila satu notis tunjuk sebab dikeluarkan, adalah menjadi keperluan utama bagi notis tersebut menyatakan dengan jelas dan secara spesifik semua tuduhan yang dikenakan terhadap saya dengan menyatakan pelanggaran mana-mana peruntukan di dalam Perlembagaan parti serta peruntukan-peruntukan di mana hukuman boleh dikenakan terhadap saya. Pernyataan secara spesifik tersebut adalah wajar untuk YB. Dato' nyatakan secara bertulis, malangnya setakat ini, notis bertarikh 5 Ogos 2014 dilihat sebagai satu notis yang cacat; tanpa butir-butir relevan serta memadai bagi membolehkan saya untuk menjawab.
2. Sementara menunggu apa-apa notis tunjuk sebab yang sah, saya menarik perhatian YB. Dato' bahawa pada setiap masa material, 'Langkah Kajang' (kononnya yang dinamakan dan dirujuk oleh YB. Dato') adalah sesuatu perkara yang tidak dibincang oleh pihak-pihak berkenaan dalam cara yang efektif dan adil dengan dan kepada saya. Sebaliknya, apa-apa keputusan yang dibuat berkenaan 'Langkah Kajang' ini telah cuba dilaksanakan sebagai satu 'arah' oleh parti kepada saya tanpa memberi pertimbangan wajar bahawa tanggungjawab saya sebagai Menteri Besar juga merangkumi tanggungjawab eksekutif terhadap semua rakyat Selangor, Majlis Mesyuarat Kerajaan Negeri Selangor termasuk menasihati DYMM Sultan Selangor berkenaan hal-hewal pentadbiran Kerajaan Negeri.

3. Alasan-alasan untuk 'Langkah Kajang' pula tidak pernah dikemukakan kepada saya secara tulus dan ikhlas supaya saya dapat menghalusinya. Alasan-alasan yang kononnya telah diberikan adalah berubah-ubah dan tidak menentu serta mewujudkan kekeliruan. Saya menegaskan di sini saya tidak pernah bersetuju tindakan 'Langkah Kajang' yang dilakukan serta tindakan En. Lee Chin Cheh meletakkan jawatan sebagai Ahli Dewan Negeri Selangor tanpa alasan munasabah yang ternyata tindakan tersebut telah mencemar prinsip demokrasi dan mengkhianati kepentingan rakyat Selangor khusus para pengundi di Kajang. Saya turut kesal setelah melakukan tindakan tersebut, En. Lee Chin Cheh tidak dikenakan sebarang tindakan tatatertib malah telah dibenarkan oleh parti dan Jawatankuasa Pemilihan Parti untuk bebas bertanding di peringkat Cabang dan Pusat sedangkan tindakan tersebut telah mencemar nama baik parti di mata parti-parti komponan Pakatan Rakyat serta rakyat Selangor.
4. Walau apa pun, pihak-pihak berkenaan yang telah cuba untuk melaksanakan 'Langkah Kajang' ini sesungguhnya mengakui dan berpengetahuan bahawa pengunduran saya sebagai Menteri Besar hanya akan diteruskan setelah mendapat persetujuan kesemua parti politik di dalam gabungan Pakatan Rakyat – PKR, PAS dan DAP serta mendapat perkenan dari DYMM Sultan Selangor. Setakat ini dan tanpa menghiraukan pendapat kesemua parti politik Pakatan Rakyat serta terlebih dahulu mendapat perkenan dari DYMM Sultan Selangor, parti nampaknya telah pada 21 Julai 2014 membuat keputusan dengan mengambil langkah-langkah keras memaksa saya meletakkan jawatan. Tindakan ini, saya dengan rendah diri, berpendapat adalah keputusan pramatang yang tidak boleh dilaksanakan. Malah jika keputusan tersebut dilaksanakan ianya merupakan satu tindakan merbahaya dan akan memprejudisikan kestabilan Kerajaan Negeri Selangor selain ianya adalah satu keputusan yang tidak adil, bukan sahaja terhadap saya tetapi terhadap kesemua Ahli Majlis Mesyuarat Kerajaan Negeri Selangor dan rakyat Selangor khususnya. Anggapan salah berkenaan kebolehan Pakatan Rakyat untuk mentadbir dan mengurus sesbuah Kerajaan Negeri dengan baik juga akan disebarluaskan oleh pihak-pihak yang tidak bertanggungjawab.
5. Dalam konteks seperti yang dinyatakan di atas, saya ingin menegaskan bahawa setelah saya dilantik sebagai Menteri Besar Selangor mengikut peruntukan Undang-Undang Tubuh Negeri Selangor, saya perlu menghormati dan melaksanakan obligasi saya untuk menegakkan peruntukan Undang-Undang tersebut, yakni saya masih mendapat sokongan majoriti (*confidence of the majority*) dalam Dewan Negeri Selangor dan tidak terdapat apa-apa alasan

m.s.: 3
NOTIS TUNJUK SEBAB

mengikut Undang-Undang Tubuh Negeri Selangor mengapa saya seharusnya meletakkan jawatan saya. Ini adalah maksud saya apabila mengeluarkan kenyataan bahawa sebarang keputusan berkenaan penukaran Menteri Besar Selangor perlu memegang kepada prinsip undang-undang dan hendaklah mengikut tatacara dan prosedur sebagaimana yang diperuntukkan di dalam Undang-Undang Tubuh Negeri Selangor termasuk memperoleh perkenan dari DYMM Sultan Selangor.

Pakatan Rakyat kini mempunyai sokongan rakyat yang kuat di seluruh negara. Melihat insiden dan kenyataan-kenyataan yang dikeluarkan oleh para pimpinan baru-baru ini serta keadaan semasa, saya amat berharap jentera parti tidak diperalatkan dalam satu skim yang bermotivasi politik untuk mengubah hala-tuju dan menjelaskan imej Kerajaan Negeri Selangor serta memprejudiskan kerja parti-parti Pakatan Rakyat.

Sebagai ahli seumur hidup Parti Keadilan Rakyat yakni sebuah parti yang menerajui perjuangan menegakkan keadilan, saya bersedia untuk menjawab sebarang pertuduhan sah yang dikenakan terhadap saya jika dilakukan secara betul dan tertib pada bila-bila masa.

Saya berdoa agar kekeliruan dan kemelut ini tidak akan berlanjutan dan kita semua dapat bersatu meneruskan perjuangan politik parti kita bersama-sama menentang kezaliman, korupsi dan penyalahgunaan kuasa pihak-pihak tertentu.

Sekian. Terima kasih.

Yang benar,



(TAN SRI DATO' SERI ABDIUL KHALID BIN IBRAHIM)
PSM., SPMS., DSAP.

s.k. Setiausaha Agung
Pengerusi Majlis Pimpinan Negeri